

IsiXhosa



VICTORY OR DEATH



IMANIFESTO

YONYULO LOORHULUMENTE
BASEKHAYA YOWAMA-2026

VOTE EFF





A. INTSHAYELELO KAMONGAMELI NOMPHATHI-MKHOLO

Unyulo loorhulumente basekhaya lowama-2026 lelinye lawona maxesha abalulekileyo kwimbali yedemokhrasi yethu. Abantu bethu bajongene nengxaki ekhulayo yolawulo olungasebenzi kakuhle, ukusilela kokunikezelwa kweenkonzo, intswela-ngqesho, urhwaphilizo, iziseko ezingundoqo eziwohlokayo noomasipala abalahle uxanduva lwabo lomgaqo-siseko. Ngoko ke, olu nyulo luvavanyo lokuba ingaba uluntu luza kuqhubeka lunyamezela ukuwohloka nokungahoywa, okanye luza kuvuka lubuyise oomasipala balo luze lubuyisele isidima kurhulumente wasekhaya.

Ngenxa yoku, siya kolu nyulo phantsi komxholo othi: Uloyiso okanye Ukufa!

Esi sibhengezo sigxininisa ukuba imeko ingxamisekile, kwaye siyaqonda ukuba abantu bethu abasakwazi ukuqhubeka benyamezela iimeko ezibangelwe yiminyaka yorhwaphilizo, ukungakwazi ukusebenza, ukukhetha izihlobo, ukuwohloka koqoqosho nokuthinjwa koorhulumente basekhaya ngoosomashishini beetenda kunye nabantu abasondelelene nezopolitiko. Kwizigidi zabantu baseMzantsi Afrika, ukusilela koomasipala asingomba nje womgaqo-nkqubo ekuthethwa ngawo; yinyani yemihla ngemihla echaphazela ukufumaneka kwamanzi, ukhuseleko ezitalatweni, ukuqokelelwa kwenkunkuma, ukulungiswa kweendlela nesidima soluntu.

I-Economic Freedom Fighters (EFF) yazisa le manifesto njengesicwangciso sokusindisa urhulumente wasekhaya. Le manifesto ibeka inkqubo esebenzayo nenokuphunyezwa yokwakha ngokutsha oomasipala abasebenzela abantu, hayi iikontraka neqaqobana labantu abakhethiweyo. Igxininisa ukuba ikamva loMzantsi Afrika lixhomekeke ekubuyiselweni kwesakhono, ukuthembeka nendima yophuhliso kurhulumente wasekhaya ukuze ilizwe liphinde lakhe amashishini. Umgaqo osisiseko okhokela le migaqo-nkqubo ngowokuba oomasipala kufuneka basebenzele uluntu, hayi iimfuno zabucala. Izixhobo zoomasipala kufuneka zisetyenziselwe ukunikezela ngeenkonzo ezisemgangathweni, ukugcina iziseko ezingundoqo zikwimeko entle, ukudala imisebenzi nokukhulisa uqoqosho lwasekuhlaleni oluzinzileyo.

Oomasipala kufuneka babe ngamaziko ocwangciso, okunikezelwa kweenkonzo nophuhliso, besebenzisa abasebenzi nezakhono zabo zangaphakathi endaweni yokuba babe ngamajelo orhwaphilizo nenkcitho.

Ukuzithemba kwethu xa sinikezela ngale manifesto akusekelwanga kwithiyori kuphela. Kusekelwe kumava okusebenza nakulawulo oluzibonakalisileyo. Kuyo yonke indawo apho i-EFF inikwe uxanduva kurhulumente wasekhaya, sibonisile



ukuba indlela eyahlukileyo yolawulo iyenzeka—indlela esekelwe ekuphenduleni, ekunikezelweni kweenkonzo, kulawulo olungqongqo lwezemali nasekuzinikeleni ebantwini.

Njengoko ulawulo lwemibutho edibeneyo lusanda, i-EFF ibambe indawo eyodwa kurhulumente wasekhaya. Nangona ingasoloko ilawula oomasipala ngokupheleleyo, isebenzise impembelelo yayo ukuqinisekisa ukuba ulawulo lusebenzela abantu. Koomasipala abohlukeneyo kuMzantsi Afrika, i-EFF isebenzise ubukho bayo kumabhunga ukuveza urhwaphilizo, ukuthintela inkcitho engeyomfuneko, ukufuna ukuba abalawuli boomasipala baphendule ngezenzo zabo nokumela iimfuno zabahlali abaqhelekileyo.

Unyulo lowama-2026 lixesha elibalulekileyo eliza kubumba ikamva loorhulumente bethu basekhaya kwiminyaka ezayo. Luza kunceda ekugqibeni ukuba uluntu luza kuqhubeka lujongene neengxaki phantsi koomasipala abawayo, okanye kuza kufunyanwa indlela entsha. Olu nyulo luza kugqiba nokuba izixhobo zoluntu ziyaqhubeka na ukutyebisa abacebisi noosomashishini beetenda, okanye ekugqibeleni ziya kujoliswa ekuhlangabezaneni neemfuno zabantu.

Imbali isibonise kaninzi ukuba inguqu yokwenene yenzeka kuphela xa abantu abaqhelekileyo, abatsha nabadala, bemyana baze basebenzise amandla abo edemokhrasi. Ngoko ke, le manifesto ingaphezulu koxwebhu lomgaqo-nkqubo. Sisibhenno esisuka entliziyweni sokuba kuthathwe amanyathelo, kwaye sisimemo esivulelekileyo kuluntu sokuba luthathe inxaxheba ekwakheni ngokutsha urhulumente wasekhaya.

Uloyiso okanye Ukufa!

B. INTSHAYELELO

I-EFF ingena kuNyulo loorhulumente baseKhaya lowama-2026 njengombutho wenguqu osele ukhulile nonamava, nowuthathe inxaxheba kurhulumente wasekhaya ngaphezu kweminyaka elishumi. Eli lixesha lesithathu i-EFF ikhuphisana kuNyulo loorhulumente baseKhaya ukusukela oko yasekwayo, emva konyulo lowama-2016 nolowama-2021.

Le Manifesto yakhela kwisiseko esomeleleyo nakumava eminyaka eli-13 e-EFF kwiPalamente kaZwelonke, kwizindlu zowiso-mthetho nakumabhunga. Ayisosibhengezo nje sezibophelelo ezitsha. Yakhela kwiimanifesto zangaphambili ze-EFF zonyulo loorhulumente basekhaya, kwiManifesto yokuSungulwa nakwizigqibo zeNdibano yaBantu yeSizwe (NPA) yowama-2024.



Le Manifesto ihlaziya kwaye ivuselela izibophelelo ekudala i-EFF inazo. Isekelwe kwimigaqo yezopolitiko yombutho nakumava okusebenza ewafumene ekuhambeni kweminyaka. Amalungu e- EFF asebenze njengoceba, njengamalungu eekomiti zoosodolophu kwezinye zezona dolophu zinkulu zoMzantsi Afrika, njengoosihlalo beekomiti zamabhunga oomasipala, njengabameli bokongamela nanjengamatshantliziyo oluntu kulo lonke ilizwe. Le manifesto ibonisa izifundo ezifundwe yi-EFF, impumelelo efunyenweyo nemingeni ekusafuneka isonjululwe ukuze kwakhiwe ngokutsha urhulumente wasekhaya.

OoMasipala baBantu abaphantsi korhulumente we-EFF baza kwamkela iNkqubo yokuSebenza ebonakalisa ngokwenene iimeko ezikhethekileyo zendawo nganye nezinto eziphambili ekunikezelweni kweenkonzo. Le Manifesto ibonelela ngesikhokelo sesizwe esiza kukhokela umsebenzi wooMasipala baBantu nooCeba be-EFF. Ichaza indlela esiwubona ngayo urhulumente wasekhaya namhlanje, ize ibeke izibophelelo zethu zokwakha oomasipala abanobuchule, abajolise kuphuhliso nabangabantu.

IManifesto yoNyulo looRhulumente baseKhaya yowama-2026 igxile kwezi ndawo ziphambili zilandelayo:

- A. Imeko yoRhulumente waseKhaya eMzantsi Afrika Namhlanje
- B. Iminyaka Elishumi ye-EFF kuRhulumente waseKhaya
- C. Izibophelelo ze-EFF kuRhulumente waseKhaya
- D. Uhlahlo-lwabiwo-mali nokuXhaswa ngeMali kooMasipala baBantu
- E. Isiphelo
- F. Isibhengezo soCeba we-EFF

C. IMEKO YORHULUMENTE WASEKHAYA EMZANTSI AFRIKA NAMHLANJE

Urhulumente wasekhaya eMzantsi Afrika ukwingxaki enzulu neya isiba mandundu. Nangona sekudlule iminyaka engaphezu kwamashumi amathathu kwafika idemokhrasi, izigidi zabantu zisaphila ngaphandle kwamanzi okusela akhuselekileyo nathembekileyo, iinkonzo zogutyulo, umbane ofikelelekayo, ukuqokelelwa kwenkunkuma rhoqo nezinye iinkonzo ezisisiseko zikamasipala. Uluntu luhlala lujongene nokunqongophala kwamanzi, ukucima kombane, ukuphuphuma kwelindle, iindlela eziwohlokayo neziseko zoluntu eziya zisiba mbi.

Urhulumente wasekhaya ufumana i-R110 yeebhiliyoni eyabelwa yiPalamente minyaka le. Kodwa ngenxa yolawulo olugwenxa lwemali norhwaphilizo,



oomasipala basilele ukunikezela ngeenkonzo ezisisiseko nokudala imisebenzi ezinzileyo.

Oomasipala ngoku basebenza njengabaqokeleli bamatyala, befuna intlawulo yamanzi, umbane, ukuqokelelwa kwenkunkuma nezinye iinkonzo kubantu abangaphangeliyo, kubantu abahluphekileyo nakumakhaya ootitshala, abongikazi, amapolisa, amajoni, oonogada nabasebenzi bakamasipala abajongene nobunzima bezemali.

Ngokutsho koMphicothi-zincwadi Jikelele, oomasipala abalawulwa yi-ANC, i-DA ne-IFP bachithe ilize i-R45.6 yeebhiliyoni kunyaka-mali wama-2024/25. Aba masipala bayasilela ukuhlawula amashishini amancinane, abasebenzi bakamasipala, u-Eskom, iibhodi zamanzi nabanye abatyalwayo ngexesha elimiselwe ngumthetho.

Oomasipala abasabaqeshi ngokuthe ngqo abasebenzi. Endaweni yoko baxhomekeke kubarhwebi ngabasebenzi nakwiinkampani ezingabalamli ezinxulumene nabezopolitiko ukuze bafumane izakhono zobugcisa, zobunjineli, zezimali nezolawulo. Ngenxa yoko, imingxuma ezindleleni ayilungiswa, ukuphuphuma kwelindle akuhoywa, amaziko ezemidlalo akagcinwa, izindlu azakhiwa, iziseko zamanzi zonakele, kwaye zininzi iindawo zokulahla inkunkuma ngokungekho mthethweni.

D. IMINYAKA ELISHUMI YE-EFF KURHULUMENTE WASEKHAYA

I-EFF yangena kurhulumente wasekhaya ngowama-2016 njengombutho wezopolitiko owawusandul' ukusekwa, uzimisele ukusebenzisa amabhunga oomasipala ukuphucula ubomi babantu abaqhelekileyo. Ukususela ekuqaleni, ooceba be-EFF bazibonakalisa njengabalwi abangenaloyiko abachasene norhwaphilizo, abakhuseli babantu abahluphekileyo nabakhokeli kumzabalazo wokunikezelwa kweenkonzo.

I-EFF inooceba abali-1 075 abamele abantu kuninzi loomasipala abangama-257 boMzantsi Afrika. Aba ceba baveze urhwaphilizo, balwela ukunikezelwa kweenkonzo, baza banyanzelisa ukuqeshwa ngokusisigxina koomasipala. Bakwalwele amanzi nombane wasimahla kubantu abahluphekileyo.

OoCeba be-EFF balwe ngokungenaloyiko norhwaphilizo nokungakwazi ukusebenza koosodolophu nabaphathi boomasipala kwiindawo ezininzi zelizwe. Ngenxa yoko, oosodolophu abaliqela barhoxiswa kwizikhundla zabo ngenxa yorhwaphilizo. Aba baquka usodolophu we-ANC kuMasipala waseDitsobotla,



owe-DA kuMasipala waseNelson Mandela Bay, owe-ANC kuMasipala waseDr JS Moroka, owe-IFP kuMasipala waseNongoma nowe-ANC kuMasipala waseSteve Tshwete.

Umsebenzi ongadinwayo wooCeba be-EFF kule minyaka ili-10 idlulileyo ukhokelele kwiimpumelelo ezininzi zokunikezelwa kweenkonzo, eziquka, kodwa zingaphelelanga kwezi zilandelayo:

1. I-EFF kwisiXeko sase-Ekurhuleni, eGauteng, yazisa yaza yaxhasa iziphakamiso ezazifuna ukuba umasipala aqeshe ngokuthe ngqo nangokusisigxina oonogada nabacoci abangaphezu kwe-150.
2. E-Ekurhuleni, eGauteng, i-EFF yandise inani labaxhamli abahluphekileyo ngabantu abali-1 819. Aba bantu ngoku bafumana amanzi, umbane neenkonzo zogutyulo ezisisiseko simahla.
3. Ilungu le-EFF leKomiti kaSodolophu (MMC) elijongene naManzi noGutyulo kwisiXeko sase-Ekurhuleni, eGauteng, lavula i-Ililiba Water Tower enomthamo weemegalitha ezi-2 eTembisa kunye ne-Northmead Water Tower enomthamo weemegalitha ezi-5.5, eyeyesibini ngobukhulu kuMazantsi eHlabathi.
4. I-EFF kwisiXeko sase-Ekurhuleni, eGauteng, yafakela umbane kumakhaya amatsha angama-2 016 ngokugqitywa kwezikhululo zombane neziguquli-mbane eClayville, eMayfield, eTokyo Phase 3, eTsakane, eKwa-Thema naseThokoza.
5. OoCeba be-EFF kwisiXeko saseTshwane, eGauteng, balwela ukubuyiselwa emsebenzini kwabasebenzi bakamasipala abangama-81 ababegxothwe ngokungekho mthethweni.
6. OoCeba be-EFF kwisiXeko saseTshwane, eGauteng, balwela ukufuduswa kwabantu abangama-500 ababethwaxwe zizikhukula eMamelodi, basiwa eLeeuwfontein.
7. I-EFF kwisiXeko saseTshwane, eGauteng, yaveza urhwaphilizo lwe-DA olunxulumene nezicwangciso zokuthengisa iPretoria West Power Station, iRooiwal Power Station kunye neWonderboom Airport.
8. Ilungu le-EFF leKomiti kaSodolophu elijongene nokusiNgqongileyo neNkunkuma kwisiXeko saseTshwane, eGauteng, lasusa inkunkuma eyayilahlwe ngokungekho mthethweni eMamelodi Hostel, eSoshanguve Station naseMabopane kufutshane neNgaka Maseko High School. I-EFF kwisiXeko saseTshwane yacima ityala lamanzi nombane elizibhiliyoni ezi-R4.3 kumakhaya ahluphekileyo angaphezu kwama-85 000.
9. Ilungu le-EFF leKomiti kaSodolophu elijongene neMpilo kwisiXeko saseJohannesburg, eGauteng, laqalisa iikliniki ezisebenza iiyure ezingama-24 kwiilokishi zaseWestbury naseFlorida, laza lalungisa iikliniki zaseZandspruit, eProtea Glen naseNaledi.



10. I-EFF kwisiXeko saseJohannesburg, eGauteng, yaguqula iPoortjie Centre yaba liziko lonyango lwabantu abachatshazelwe kukusetyenziswa gwenxa kweziyobisi.
11. Ilungu le-EFF leKomiti kaSodolophu elijongene noKhuseleko loLuntu kwisiXeko saseJohannesburg, eGauteng, laseka i-JMPD Tactical Reaction Unit ukuze ilwe nolwaphulo-mthetho kumbindi wesixeko.
12. OoCeba be-EFF kuMasipala waseTswaing, kuMasipala waseTaung (kwiWadi 4) nakuMasipala waseMadibeng (kwiWadi 4 nama-27) banikezela ngemingxuma yamanzi neetanki zeJoJo.
13. OoCeba be-EFF kuMasipala waseMadibeng baqhuba ikhitshi lemhla ngemihla kwiWadi 27 elinika ukutya kumakhaya ahlupekileyo.
14. OoCeba be-EFF kuMasipala waseDitsobotla bafaka isindululo sokungamthembi usodolophu, nto leyo eyakhokelela ekususweni kukasodolophu we-ANC owayenorhwaphilizo.
15. OoCeba be-EFF kuMasipala waseTaung balwela ukumiselwa ngokusesikweni kweLyk.
16. I-EFF kuMasipala waseBuffalo City, eMpuma Koloni, yanqanda ukudilizwa ngokungekho mthethweni kwamakhaya ngurhulumente we-ANC kummandla waseBhongweni.
17. OoCeba be-EFF kuMasipala waseBuffalo City, eMpuma Koloni, balwela ukuba abantu beWadi 50 nemimandla eyingqongileyo bafumane umbane.
18. Ilungu le-EFF leKomiti kaSodolophu elijongene noMbane naMandla kuMasipala waseNelson Mandela Bay, eMpuma Koloni, laphucula iMotherwell Main Substation.
19. Ilungu le-EFF leKomiti kaSodolophu elijongene noHlahlo-lwabiwo-mali noNondyebo kuMasipala waseNelson Mandela Bay lacima ityala likamasipala le- R3.4 yezigidi le-Ekuphumleni Old Age Home, emva kotypelelo nesibophelelo esenziwa nguMongameli we-EFF.
20. Ilungu le-EFF leKomiti kaSodolophu elijongene noHlahlo-lwabiwo-mali noNondyebo kuMasipala waseNelson Mandela Bay lacima amatyala amakhaya awayesokola eCentral, eKwaMagxaki, eKwadwesi, eMotherwell naseBluewater Bay.
21. OoCeba be-EFF kuMasipala waseBig Five Hlabisa, KwaZulu-Natal, babonelela abantu beWadi 6 ngamanzi ngomngxuma wamanzi.
22. OoCeba be-EFF kwisiXeko saseKapa, eNtshona Koloni, balwela ukugqitywa kweprojekthi yombhobho wamanzi neendlela kufutshane neGugulethu Housing Project.
23. OoCeba be-EFF kwisiXeko saseKapa, eNtshona Koloni, balwela ukuvulwa kwakhona kwequla lokuqubha.



24. OoCeba be-EFF kuMasipala weSithili sase-Ehlanzeni, eMpumalanga, baququzelela ukutshintshwa kwe-Elijah Mango College ukuze ibe yi-Ehlanzeni TVET College.
 25. OoCeba be-EFF kuMasipala waseThaba Chweu, eMpumalanga, banqanda ukugxothwa ngokungekho mthethweni kwabahlali basezifama kwiiWadi 4 nesi-5 yi- ANC.
 26. OoCeba be-EFF kuMasipala waseDihlabeng, eFree State, banceda abantu beWadi 17 ukuba bafumane amanzi nombane kamasipala simahla kumakhaya ahluphekileyo.
 27. OoCeba be-EFF kuMasipala waseMafube, eFree State, baququzelela ukwabiwa kweziza ngumasipala.
 28. OoCeba be-EFF kuMasipala waseDihlabeng, eFree State, baveza urhwaphilizo lukamasipala.
 29. I-EFF kuMasipala wase-Emthanjeni, eNorthern Cape, yakhuthaza ukukhawuleziswa kokukhutshwa kwamaxwebhu obunini kunye namanyathelo okusombulula umva ekudala ukho wokukhutshwa kwala maxwebhu.
- Ngezi mpumelelo kule minyaka ilishumi idlulileyo, i-EFF ifumene amava axabisekileyo ekongameleni nasekulawuleni. Kungenxa yesi siseko ke apho i-EFF inikezela khona izibophelelo zayo zooMasipala baBantu.

E. IZIBOPHELELO ZE-EFF

a) Umhlaba noQoqosho lwezoLimo

I-EFF iyawuqonda umnqweno wembali wabantu wokufumana umhlaba, kwakunye nokusilela okuphindaphindiweyo korhulumente we-ANC ukuwusombulula lo mba. Kwixesha elikhawulezileyo nelifutshane, injongo yabo bonke oomasipala be-EFF kukufumana umhlaba oza kusetyenziselwa izindlu, iinkonzo zonqulo, amashishini nezolimo. Bonke oomasipala be- EFF baza kuyeka ukuthengisa umhlaba kamasipala, bawabele uluntu oluNtsundu ukuze uphinde wabiwe.

Oomasipala be-EFF baza:

1. Kusebenzisa amagunya okuhlutha umhlaba ukuhlutha umhlaba nezakhiwo ezishiyiweyo ukuze zisetyenziswe lulutsha kwezolimo nakwamanye amashishini.
2. Kubekela bucala phakathi kwe-5% ne-10% yomhlaba owabiwa ngokutsha ukulungiselela abantu abaphila nokukhubazeka, kuqinisekiswa inkxaso nezixhobo zezolimo ezifikelelekayo.



3. Kuqulunqa isicwangciso esicacileyo sohlaziyo lomhlaba esilungele indawo nganye nesidibanisa isicwangciso sophuhliso lwasemaphandleni oluzinzileyo. Esi sicwangciso siya kugxila ekunciphiseni indlala yasemaphandleni ngokusebenzisa ngobuchule izixhobo ezifumanekayo.
4. Kwenza umhlaba okufutshane namaziko asezidolophini ufumaneke ukuze kwakhiwe iindawo zokuhlala, kuhlantatyezwane nemfuno engxamisekileyo yohlaziyo lomhlaba wasezidolophini.
5. Kungena kwizivumelwano zentsebenziswano neenkokeli zemveli ukuze kuphuhlise umhlaba kwiindawo eziphantsi kolawulo lwazo, ngenjongo yokusebenzisa umhlaba wasemaphandleni ukukhuthaza uphuhliso olukhokelwa lulutsha.
6. Kusebenzisana neekholeji zezolimo ezikufutshane ukomeleza iinkonzo zenkxaso kumafama asemaphandleni.
7. Kuseka amaziko eemarike angawoomasipala apho amafama asakhulayo anokuzisa iimveliso zawo kwindawo enye yokuthengisa.
8. Kwakha isilarha esikhulu esingelikamasipala, esiza kunceda amafama asakhulayo athengise imfuyo yawo.
9. Kunceda amafama asakhulayo afumane amalungelo amanzi nezixhobo ezibalulekileyo zokukhuthaza ezolimo eMidvaal, eRand West City naseMerafong eGauteng, naseDr Pixley Ka Isaka Seme naseNkomazi eMpumalanga.
10. Kwahlula umhlaba ube ziziza ezincinane ukuze kuvumeleke ulimo olunzulu lomlinganiselo omncinane, kuxhaswe ulutsha olunzi kangangoko kunokwenzeka.
11. Kuqinisa ukunyanzeliswa kwemithetho yocandomhlaba ukuqinisekisa ukuba umhlaba wezolimo awuguqulelwa ekubeni ngowezindlu okanye usetyenziselwe ezinye iinjongo.
12. Kuthethana namasebe karhulumente angabanini bomhlaba ukuze umasipala abe nelungelo lokuqala lokuwuthenga xa uthengiswa okanye udluliselwa, ngaloo ndlela afumane umhlaba ofunekayo kuhlaziyo lomhlaba lwasekuhlaleni.
13. Kuchonga kwaye kusebenzisane nee-Communal Property Associations, kunikezelwe uqeqesho nenkxaso emva kokuhlaliswa kwabantu emhlabeni.
14. Kuchonga nokukhuthaza iiprojekthi zokuncenkceshela ngomlinganiselo omncinane kumhlaba okhoyo, kuqiniswa ulimo lwamafama amancinane olumelana notshintsho lwemozulu, ngenjongo yokudala ubuncinane imisebenzi engama-500 yolutsha kumasipala ngamnye kwikota yokuqala yolawulo.



b) Amakhaya Ahluphekileyo neeNkonzo eziSisiseko zaSimahla

Oomasipala be-EFF baza:

1. Kwakha oomasipala abaqinisekisa ukuba wonke umntu ufumana iinkonzo ezisisiseko ezithembekileyo nezifikelekayo, njengesiseko sesidima somntu nokuthatha inxaxheba kuqoqosho.
2. Kuqinisekisa ukuba onke amakhaya ahluphekileyo afanelekileyo afumana iinkonzo ezisisiseko simahla njengoxanduva lomgaqo-siseko nophuhliso.
3. Kubhalisa ngokuzenzekelayo bonke abafumana izibonelelo ze-SASSA abafanelekileyo namanye amakhaya ahluphekileyo zingaphelanga iintsuku ezingama-90 emva kokungena ezikhundleni, kusetyenziswa iinkqubo ezidityanisiweyo zoomasipala, kususwe imiqobo yolawulo ethintela abantu abafanelekileyo ekufumaneni inkxaso.
4. Kubonelela onke amakhaya ahluphekileyo ngamanzi, umbane, ugutyulo nokuqokelelwa kwenkunkuma simahla, kuquka awasezindaweni zamatyotyombe, kumagumbi angasemva nakwiindawo zasemaphandleni.
5. Kucima onke amatyala amadala amakhaya ahluphekileyo, kuqalise iinkqubo zokuwanceda aphume ematyaleni, kuze kupheliswe ukunqunyanyiswa kweenkonzo njengesohlwayo kumakhaya afanelekileyo.
6. Kuthumela iiyunithi ezihambayo zikamasipala noonontlalontle emakhayeni abantu abalele ebhedini, abadala nabakhubazeke kakhulu ukuze babhaliswe kuluhlu lwabahluphekileyo ngaphandle kokuba baye kwiiofisi zikamasipala.
7. Kubeka iitoliki eziqeqeshiweyo zoLwimi lweZandla lwaseMzantsi Afrika (SASL) kuwo onke amaziko kamasipala okunceda abathengi.
8. Kunyusa isabelo samanzi nombane wasimahla sifikelele kumlinganiselo owaneleyo ukupheka, ukufudumeza, impilo, isidima nemisebenzi emincinane yezoqoqosho.
9. Kusebenzisa amaxabiso eenkonzo anyuka ngokwezinga lokusetyenziswa, akhusela amakhaya ahluphekileyo ngoxa kugcinwa uzinzo lwexesha elide lwezemali zoomasipala.
10. Kuseka iiNdibano zoHlahlo-lwabiwo-mali lwaBantu ezisekelwe kwiiwadi, ukuze uluntu lubeke iliso kwiinkonzo ezisisiseko zasimahla, inkxaso yabahluphekileyo namaxabiso eenkonzo.
11. Kuqinisekisa ukuba iinkonzo ezisisiseko zithembekile, zikhuselekile kwaye zikumgangatho ophezulu, nokuba ukunikezelwa kwazo kuthathwa njengomba wophuhliso, hayi umsebenzi wokwenza inzuzo.



c) Ukunciphisa iindleko zokuphila kumaKhaya aSebenzayo nakumgangatho oPhakathi

I-EFF iyaqonda ukuba ukunyuka kweendleko zokuphila akuchaphazeli kuphela amakhaya ahluphekileyo, kodwa kuchaphazela nawabasebenzi namakhaya akumgangatho ophakathi. Ootitshala, abongikazi, amapolisa, amagcisa, iingcali nabanye abasebenzi abaninzi baya besokola ukuhlawula iindleko ezinyukayo zeenkonzo zikamasipala.

Ukuxhasa la makhaya, oomasipala be-EFF baza:

1. Kuseka amanyathelo enkxaso ajoliswe kumakhaya asebenzayo nakumgangatho ophakathi ajongene nobunzima bezemali.
2. Kubonelela ngoncedo lwethutyana ngamaxabiso alungisiweyo, inkxaso-mali, amalungiselelo entlawulo afikelelekayo neenkqubo zokunciphisa amatyala kamasipala.
3. Kusebenzisa iinkqubo zokulumkisa kwangethuba ezisebenzisa iinkcukacha zeebhili neentlawulo ukuchonga amakhaya asemngciphekweni, kungenelelwe ngaphambi kokuba amatyala angalawuleki.
4. Kuthintela ukuqokelelana kwamatyala amakhaya angenakuhlawuleka ngokungenelela kwangethuba, ngenkxaso yezemali nangamalungiselelo entlawulo anokwenziwa.
5. Kuqinisekisa ukuba ukufikelela kuncedo lukamasipala kulula, kunesidima kwaye akunamaphepha angeyomfuneko.

d) Ukwakha iSakhono saNgaphakathi nokuQesha ngokuNgqalileyo

Oomasipala be-EFF baza:

1. Kwiinyanga ezingama-24 ezizayo, kuqesha abasebenzi bakamasipala ngokuthe ngqo ukuze kuncitshiswe ukuxhomekeka kubarhwebi ngabasebenzi nakwiithenda zemisebenzi ephambili.
2. Kwakha ulawulo lukamasipala olunobuchule, oluqeqeshiweyo nolunesimilo, olunoonjineli, abacwangcisi, amagcisa, abaphathi bezemali, abalawuli nezinye iingcali ezifanelekileyo.
3. Kwenza ulawulo lukamasipala lube lolobungcali ngokuqesha ngokusekelwe kwiziqinisekiso, kwisakhono, kumava nakubunkokeli obunesimilo.



4. Kuseka isakhono sangaphakathi esisisigxina sokwenza ulondolozo, ulawulo lwenkunkuma, ukhuseleko, uphuhliso lweziseko nezinye iinkonzo ezibalulekileyo.
5. Komeleza isakhono socwangciso nolawulo lweprojekthi ukuze uhlahlo-lwabiwo-mali, iiprojekthi zeziseko neenkqubo zophuhliso lwezoqoqosho zilungelelaniswe kwaye ziphunyezwe kakuhle.
6. Kuphucula ulawulo lwezemali, ukuqokelelwa kwengeniso neenkqubo zohlahlo-lwabiwo-mali ukuze izixhobo zikamasipala zisetyenziswe ngobuchule kwaye zijoliswe kwiinkonzo.
7. Kubuyisa yonke imali etyalwa oomasipala ngamasebe karhulumente, amashishini nabanye abatyalayo abakhulu, ngoxa kukhuselwa amakhaya ahluphekileyo.
8. Kulungisa iinkqubo zokuthenga ukuze kupheliswe urhwaphilizo, ubuqhetseba nenkcitho, kusetyenziswa iinkqubo ezicacileyo, ezinobulungisa nezibeka abantu ekuphenduleni.
9. Kupapasha zonke iithenda, izigqibo zokunikezelwa kwazo nezivumelwano; kunyanzelise izohlwayo ezingqongqo kurhwaphilizo; kuze kuthintelwe iinkampani nabantu abafunyaniswe benetyala ekufumaneni umsebenzi kamasipala.
10. Kusebenzisa ukuthenga kukamasipala ukuxhasa uphuhliso lwezoqoqosho lwasekuhlaleni, ukudalwa kwemisebenzi, ookopolotyeni, ii-SMME namashishini asezilokishini.
11. Kuqinisekisa ukuba zonke iinkonzo zobungcali ezinikezelwa ngaphandle zibandakanya ukudluliselwa kwezakhono neenkqubo zokwakha isakhono sikamasipala.
12. Kuphucula ulawulo ngenguqu epheleleyo yedijithali kwiibhili, ukhathalelo lwabathengi, izikhalazo, iimvume, iilayisenisi, ukudityaniswa kweenkonzo neenkqubo zangaphakathi zomsebenzi.
13. Kumilisela ulawulo kuluntu ngeentlanganiso zokuphendula kwiwadi, iindlela zokunika ingxelo ngeenkonzo, amaqonga ocwangciso athatha inxaxheba namaziko eenkonzo zikamasipala afikelelekayo.
14. Kumisela iithagethi ezicacileyo zomsebenzi, iinkqubo zokubeka iliso namanyathelo okuphendulisa amagosa, abaphathi abaphezulu neenkokeli zikamasipala.

e) Imisebenzi nee-SMME

I-EFF iyaqonda ukuba oomasipala banamandla amakhulu okuqesha abantu, ukudala imisebenzi nokukhuthaza uqoqosho lwasekuhlaleni, ngoxa besakha isakhono sangaphakathi sokunikezela iinkonzo kakuhle. Oomasipala be-EFF baza kusebenzisa la mandla ukudala imisebenzi, ukunciphisa intswela-ngqesho,



ukomeleza isakhono sikamasipala nokukhuthaza ukukhula koqoqosho olubandakanya wonke umntu.

Oomasipala be-EFF baza:

1. Kuqesha ngokuthe ngqo abasebenzi bokhuseleko, abacoci, abaqokeleli benkunkuma, abasebenzi bolondolozo nabanye benkonzo eziphambili ukuze kudalwe imisebenzi esisigxina.
2. Kuseka amaqela amagcisa kamasipala emibhobho yamanzi, umbane, ukulungiswa kweendlela, ulwakhiwo nokulungiswa kweziseko, kugxilwe ekuqeshweni kwabasetyhini, ulutsha nabahlali bendawo.
3. Kusebenzisa iinkqubo zikamasipala zoqeqesho lomsebenzi, amava omsebenzi nophuhliso lwezakhono ezinxulumene neenkonzo, iziseko nolondolozo.
4. Kwakha uqoqosho lwasekuhlaleni olomeleleyo ngokuxhasa ii-SMME, ookopolotyeni, amashishini asezilokishini nabarhwebi basesitalatweni ngamathuba okuthenga, inkxaso yezoshishino nokufikelela kwiimarike kwiindawo ezifana ne-uMzumbi Ward 19 KwaZulu-Natal, iMusina, iLepelle-Nkumpi, iPhalaborwa ne-Ephraim Mogale eLimpopo.
5. Kuphucula nokwandisa iMarike yaseTshakhuma ibe liziko lale mihla lorhwebo nokulungiswa kweemveliso zezolimo.
6. Kwabela ubuncinane i-80% yokuthenga kukamasipala kwii-SMME zasekuhlaleni, ookopolotyeni namashishini asezilokishini.
7. Kwenza urhwebo olungekho sesikweni lube semthethweni kwaye kuluxhase ngeendawo zokurhweba, iindawo zokugcina, amanzi, ugutyulo, umbane nemithetho exhasayo.
8. Kuseka amaziko enxaso kamasipala anceda ngobhaliso lwamashishini, ukuthotyelwa kwemithetho, iingcebiso, inkxaso yokufumana imali nokufikelela kwiimarike.
9. Kuseka iimarike zikamasipala, iindawo zokugcina, iziseko zokugcina iimveliso zibanda namaziko othutho adibanisa abavelisi abancinane, abarhwebi, ookopolotyeni namashishini angekho sesikweni neemarike ezizinzileyo.
10. Kuphuhlisa amaziko amashishini ezilokishini nasemaphandleni axhasa ukuvelisa, ukulungiswa kweemveliso zezolimo, iinkonzo nemveliso yasekuhlaleni.
11. Kufaka abaqokeleli bezinto ezinokuphinda zisetyenziswe namanye amashishini oluntu kwiinkqubo ezisemthethweni zikamasipala, bahlawulwe ngobulungisa kwaye bafumane inkxaso namathuba ezoqoqosho azinzileyo.



12. Kuseka amaziko olutsha okusungula izinto ezintsha nawoshishino abonelela ngezakhono zedijithali, inkxaso yezoshishino, izixhobo namathuba amashishini olutsha.

f) Imidlalo, ubuGcisa neNkcubeko

Oomasipala be-EFF baza:

1. Kususa imifanekiso eqingqiweyo yexesha localucalulo, bathiye ngokutsha izitalato, iidolophu neendawo zikawonke-wonke ezizukisa ubukoloniwali nocalucalulo, baze bazithiye ngamagama neempawu ezibonisa imbali, amaqhawe neminqweno yabantu boMzantsi Afrika.
2. Kugcinwa nokukhuthaza imbali, inkcubeko nelifa lemveli laseAfrika ngeemyuziyam, izikhumbuzo, ubugcisa boluntu nangokwakhiwa kwezikhumbuzo ezizukisa iinkokeli zaseAfrika nezazichasene nobukoloniwali.
3. Kwakha, kugcina kwaye kuphucula amabala ezemidlalo, amathala eencwadi, iipaki, amaziko olonwabo, iziteyidiyam namanye amaziko oluntu, kugxilwe kwizilokishi, iindawo zamatyotyombe neendawo zasemaphandleni.
4. Kuqinisekisa ukuba zonke iziteyidiyam zikamasipala, iiholo zoluntu, amaqula okuqubha namaziko obugcisa aneendlela zokungena ezifanelekileyo, izihlalo ezifikelekayo ngezitulo ezinamavili namagumbi okutshintsha alungiselelwe abantu abakhubazekileyo.
5. Kusebenzisana nemibutho yabantu abakhubazekileyo ukuze iimfuno zabahlali abakhubazekileyo kwezemidlalo, kubugcisa nakwinkcubeko zichongwe kwaye zibekwe phambili kwiwadi nganye.
6. Kuqinisekisa ukuba iwadi nganye inamaziko olonwabo akhuselekileyo, iindawo zokuzilolonga ngaphandle, iziseko zemidlalo neendawo zoluntu zemisebenzi yezentlalo, yenkcubeko neyonwabo.
7. Kusebenzisana nezikolo, imibutho yezemidlalo nemibutho yoluntu ukwandisa ukuthatha inxaxheba kwezemidlalo, kulonwabo, kubugcisa nakwinkcubeko, ngakumbi kulutsha, abasetyhini nabantu abakhubazekileyo.
8. Kusingatha rhoqo imisitho yezemidlalo, yenkcubeko nelifa lemveli ukuze kukhuthazwe umanyano loluntu, italente yasekuhlaleni nokuthatha inxaxheba koluntu.
9. Kuseka iingxowa-mali zikamasipala zobugcisa, inkcubeko nelifa lemveli ukuxhasa amagcisa, iimvumi, abenzi beefilimu, ababhali, abadlali nabanye abasebenzi bokuyila.



10. Kuxhasa amagcisa namashishini okuyila asekuhlaleni ngokuwanika amaziko, izixhobo, uqeqesho, imiboniso yoluntu, imisitho kamasipala, iminyhadala namathuba okuthenga.
11. Kuxhasa izikhululo zikanomathotholo zoluntu, amaphephandaba asekuhlaleni namaqonga eendaba zoluntu njengezixhobo zophuhliso, ukwabelana ngolwazi nokuvakalisa inkcubeko.
12. Kuseka amaziko obugcisa nenkcubeko, amaziko oluntu asetyenziswa ngeendlela ezininzi namaziko okuyila axhasa imveliso yenkcubeko, uqeqesho nophuhliso lwamashishini.
13. Kukhuthaza ukukhula kwamashishini enkcubeko nawokuyila ukuze abe negalelo kwingqesho, kuphuhliso lwezoqoqosho, kwintlalo-ntle nasekuthinteleni ulwaphulo-mthetho.
14. Kuxhasa imveliso yasekuhlaleni namashishini abaNtsundu xa kuthengwa izixhobo zemidlalo, zenkcubeko nezolonwabo.
15. Kuqinisekisa ukuba iinkqubo zemidlalo, ubugcisa, inkcubeko nelifa lemveli zibandakanya wonke umntu kwaye ziyafikeleleka kubasetyhini, ulutsha nakubantu abakhubazekileyo.
16. Kusebenzisa imidlalo, ubugcisa, inkcubeko nelifa lemveli ukwakha uluntu olusempilweni, olumanyeneyo noludlamkileyo, ngoxa kuqhutyelwa phambili inkululeko yezoqoqosho nophuhliso loluntu.

g) Oomasipala be-EFF ngokuLingana ngokweSini, uKhuseleko noPhuhliso lweNtlalo

Oomasipala be-EFF baza:

1. Kunyanzelisa ubuncinane i-50% yokumelwa kwabasetyhini kubunkokeli, kulawulo, kwingqesho, kumathuba okuthenga nakwiinkqubo zophuhliso lwezoqoqosho zikamasipala.
2. Kuseka iiYunithi zokuLingana ngokweSini neendlela zokubeka iliso ukuqinisekisa ukuthotyelwa kweethagethi zokulingana nokulungelelanisa iinkqubo zokuxhobisa abasetyhini namantombazana.
3. Kusebenzisa uhlahlo-lwabiwo-mali oluthathela ingqalelo isini ukuze izixhobo zikamasipala zibe negalelo ngqo ekuphuculeni ubomi babasetyhini.
4. Kusebenzisa iinkqubo ezilwa nolawulo lwamadoda, ucalucalulo ngokwesini nobundlobongela obujoliswe kubasetyhini ngemfundo, ulwazi, ukuhlanganisa uluntu nokubandakanya amadoda ekulweni ubundlobongela obusekelwe kwisini nokubulawa kwabasetyhini.
5. Kusebenzisana neenkokeli zemveli, imibutho yezenkolo, imibutho yoluntu, amaqumrhu oluntu namaziko okunyanzelisa umthetho



- ukukhuthaza ukulingana nokuphelisa izenzo eziyingozi ezinyhasha amalungelo abasetyhini namantombazana.
6. Kubeka phambili abasetyhini, ngakumbi amakhaya akhokelwa ngabasetyhini, kwiinkqubo zokuxhotyiswa kwezoqoqosho, inkxaso yabahluphekileyo, izindlu nophuhliso loluntu.
 7. Kudala imisebenzi, uphuhliso lwezakhono, amashishini namathuba okuthenga ajoliswe kubasetyhini kuwo onke amacandelo oqoqosho lwasekuhlaleni.
 8. Kuseka iindlela ezikhuselekileyo nezifikelekayo zokuxela ubundlobongela obusekelwe kwisini, ukuxhatshazwa ngokwesondo, ukuxhatshazwa nokuphathwa gadalala, zixhaswe ngamagosa kamasipala okunyanzelisa umthetho namaqumrhu okhuseleko oluntu aqeqeshwe kakuhle.
 9. Kuxhasa abasinde kubundlobongela obusekelwe kwisini ngeendawo zokuhlala, iindawo zokhuseleko, iingcebiso neenkqubo zenkxaso ezisekelwe kwiwadi.
 10. Kusebenzisana neNkonzo yamaPolisa yaseMzantsi Afrika namaqumrhu okhuseleko oluntu ukulwa ukunyanzeliswa kwemali, ubundlobongela namaqela olwaphulo-mthetho ajolise kubarhwebi abangekho sesikweni, amashishini asezilokishini, iindawo zokwakha, iindlela zezothutho noluntu olusesichengeni.
 11. Kulungisa zonke izikhululo zamapolisa zikamasipala neendawo zongxamiseko ukuze zibe neendawo zokungena nezinyuko ezilungele izitulo ezinamavili, kunye namagumbi abucala okunika iingcebiso.
 12. Kuthintela abantu namashishini anxulumene nobundlobongela obusekelwe kwisini, udlwengulo, ukuxhatshazwa kwabantwana, ukuxhaphaza, ukunyanzeliswa kwemali okanye ulwaphulo-mthetho olulungelelanisiweyo ekufumaneni amathuba okuthenga kamasipala.
 13. Komeleza iinkonzo zempilo yoomama, ezempilo yokuzala nezonyango olusisiseko ngeekliniki ezinezixhobo ezingcono, abasebenzi abongezelekileyo neenkqubo zenkxaso zoluntu.
 14. Kuqinisekisa ukuba iziseko zikamasipala—kuquka amanzi, ugutyulo, izibane zikawonke-wonke, iindlela neendawo zoluntu—ziyilwa kwaye zigcinwa ngendlela ephucula ukhuseleko, isidima nokuhamba kwabasetyhini.
 15. Kukhusela amalungelo nesidima samaqela asesichengeni, kuquka abantwana, abantu abadala, abantu be-LGBTQIA+ nabasebenzi bezesondo, ngeenkonzo neenkqubo zikamasipala ezibandakanya wonke umntu.



16. Kuxhasa ookopolotyeni abakhokelwa ngabasetyhini, iiprojekthi zezolimo, amashishini asezilokishini namanye amalinge ezoqoqosho asekelwe kuluntu ngoncedo lukamasipala olujoliswe kubo.
17. Kuseka iinkqubo namaphulo okulwa iziyobisi, ukukhulelwa kolutsha, ubundlobongela obusekelwe kwisini nokuwohloka koluntu, ngoxa kukhuthazwa inkxaso yosapho, umanyano loluntu nokuvuselelwa kwemilinganiselo yokuziphatha.
18. Kuseka izindlu zangasese ezinokusetyenziswa nguye wonke umntu nezingahlulwanga ngokwesini kuzo zonke iifosi zikamasipala, amathala eencwadi, amaziko ezothutho neeholo zoluntu.
19. Kusebenzisa amaphulo emfundo nokwazisa ezikolweni naseluntwini malunga nokuthintela udlwengulo, ubundlobongela obusekelwe kwisini neendlela zokuxela ezifumanekayo kwabasindileyo.

h) Impilo

Oomasipala be-EFF baza:

1. Kwandisa ukufikelela kwiinkonzo zonyango olusisiseko ezipheleleyo, kuquka ezempilo yezesondo nokuzala, impilo yoomama, ukhathalelo lwe-HIV, impilo yengqondo nenkxaso ngokwasengqondweni nangokwentlalo.
2. Kuthumela iyunithi zempilo ezihambayo nabasebenzi bezempilo boluntu ukuba banikezele ngeenkono, uvavanyo, ukuthunyelwa kwezigulane nonyango olulandelelweyo kwiindawo zasemaphandleni, ezisemaphandleni asondele ezidolophini nezingenazo iinkonzo ezaneleyo.
3. Kubeka iitoliki eziqeqeshiweyo zoLwimi lweZandla lwaseMzantsi Afrika (SASL) kuwo onke amaziko empilo aphambili.
4. Kuqeqesha abasebenzi bokwamkela abantu ezikliniki, abalawuli, abongikazi nabasebenzi bezempilo boluntu ngamalungelo abantu abakhubazekileyo, unxibelelwano olunentlonipho neendlela ezikhuselekileyo zokubaphakamisa nokubahambisa.
5. Kuphelisa imigca emide yezigulane ezisesichengeni ngokuseka imigca yokubeka phambili kwezi gulane nokubonelela ngezihlalo ezifanelekileyo.
6. Kwandisa iiyure zokusebenza kweekliniki nokuphuhlisa ngokuthe chu iikliniki ezisebenza iiyure ezili-12 nezingama-24 apho imfuno nezixhobo zivumayo.



7. Kulungisa iTshisaulu Clinic, iMakwarela Clinic neTshidimbini Clinic, kuze kwakhiwe amaziko empilo amatsha ukuze kwandiswe ukufikelela kunyango nokunciphisa ukuxinana.
8. Kusebenzisa iinkqubo zedijithali zolawulo lwezigulane nezedinga ukunciphisa ixesha lokulinda, ukuphucula ukusebenza nokukhusela iimfihlo zezigulane.
9. Komeleza ukhathalelo lwezigulane ngokunyanzelisa imigangatho yobungcali, imigaqo yokuziphatha kwezonyango namalungelo ezigulane ngoqeqesho oluqhubekayo nokuphendulisa abasebenzi.
10. Kuqesha, kuqeqesha kwaye kugcina abasebenzi bezempilo, kuquka abasebenzi bezempilo boluntu, abongikazi nabanye abasebenzi abaphambili, ukuphucula ukufikelela kunyango olusemgangathweni.
11. Kuqinisekisa ukuba onke amaziko empilo kamasipala anombane namanzi athembekileyo, umbane ogcinelwe ixesha likaxakeka neenkonzo ezibalulekileyo ukuze ukunikezelwa konyango kungaphazamiseki.
12. Kuphucula iindlela, iindlela zezothutho neziseko ezikhokelela kwiikliniki nakumaziko empilo ukuze izigulane, ii-ambulensi neenkonzo zongxamiseko zikwazi ukufikelela lula.
13. Kuseka iiyunithi namaziko enxaso kumaxhoba kwiwadi nganye, ukuze abasinde kubundlobongela obusekelwe kwisini bafumane inkxaso yezonyango, yomthetho, yophando lwezobungqina, yengqondo nezentlalo.
14. Kuphucula impilo yoomama, abantwana neyokuzala ngoqeqesho olukhethekileyo, amaziko aphucukileyo, ukhathalelo emva kokubeleka neenkqubo zenkxaso zoomama, abantwana nabasebenzi bezempilo.
15. Kuqinisekisa ukuba iiphedi zococeko zasimahla zihlala zifumaneka kwiikliniki nakumaziko empilo oluntu.
16. Kubonelela ngeenkonzo ezikhethhekileyo, kuquka unyango lwentetho nenkxaso yophuhliso lwabantwana abaneemfuno ezikhethhekileyo.
17. Kubonelela ngenkxaso ejoliswe kumaqela asesichengeni, kuquka abantu abakhubazekileyo, abantu be-LGBTQIA+, abafuduki, abantu abahluphekileyo nabasinde kubundlobongela obusekelwe kwisini.
18. Kunyanzelisa ukuba ii-ambulensi zifike kungadlulanga imizuzu engama-20 ezidolophini nemizuzu engama-30 emaphandleni.
19. Kudibanisa amaxhwele aqinisekisiweyo kwiinkqubo zempilo zasekuhlaleni nokubonelela ngeziseko ezinesidima zokufikelela kunyango lwemveli nolwemveli yasekuhlaleni ecaleni konyango lwesiqhelo.



20. Kuseka izitiya zemifuno eziqhutywa luluntu nezinxulumene neekliniki ukuxhasa iinkqubo zesondlo nokhuseleko lokutya kwiintsapho ezisesichengeni.
21. Kuqesha abasebenzi bezempilo boluntu njengabasebenzi bakamasipala ukuze baqhube iinkqubo emakhayeni zempilo, isondlo nophuhliso lwabantwana.
22. Kwakha amaziko kamasipala okubuyisela abantu kwimeko entle nokusebenzisa iinkqubo zoluntu zokulwa ukusetyenziswa gwenxa kweziyobisi, ngakumbi kulutsha, kwiindawo ezichongiweyo emaphandleni, ezilokishini nakwiimetro.
23. Kusebenzisana nezikolo, amaziko empilo, amaqumrhu oluntu nemibutho yoluntu ukuqhuba iinkqubo zokwazisa nokufundisa ngobungozi beziyobisi, utywala nokutshaya, ngoxa kukhuthazwa indlela yokuphila esempilweni.

i) Amandla noMbane

Oomasipala be-EFF baza:

1. Kuphatha umbane njengenkonzo yoluntu ekhuthaza uphuhliso, hayi njengendlela yokwenza inzuzo.
2. Kuphelisa iintlawulo ezongezelelekileyo kwiimitha zombane ohlawulelwa kwangaphambili, kufakelwe ezi mitha simahla, kuze kususwe inzuzo engeyomfuneko eyongezwa ngabathengisi bombane bangaphandle.
3. Kubuyisela ulawulo olupheleleyo lukamasipala kwiibhili zombane, ukuhanjiswa kombane nolawulo lwengeniso.
4. Komeleza ukuqokelelwa kwengeniso ngeenkqubo eziphucukileyo zeebhili, iimitha ezikrelekrele nokunyanzeliswa komthetho ngobulungisa kubasebenzisi bombane omninzi abangahlawuliyo.
5. Kufakela iinkqubo zeemitha zale mihla ezingaphazanyisekiyo nokwenza uqhagamshelo lombane kwiindawo zamatyotyombe lube semthethweni, ukuphucula ukhuseleko nokuqokelelwa kwengeniso.
6. Kwandisa ukufikelela kwizixhobo zamandla ahlaziyekayo, kuquka iipaneli zelanga, izifudumezimanzi zelanga neenkqubo zokugcina umbane ngeebhetri emakhayeni.
7. Kuqesha ngokuthe ngqo amaqela oonjineli, abasebenzi bombane, amagcisa obugcisa namanye amagcisa ukuze agcine iziseko zombane zikamasipala zikwimeko entle.
8. Kuphucula, kwandise kwaye kugcine izikhululo zombane, iziguqulimbane nothungelwano lokuhambisa umbane ukuze umbane uthembeke



kwaye kuncitshiswe ukucima kwiindawo ezifumana iinkonzo kuMzantsi Afrika wonke.

9. Kubeka phambili ukufakelwa kombane kwiindawo zamatyotyombe, emaphandleni nakwezinye iindawo ezingafumani nkonzo yaneleyo, kwandiswe izibane zikawonke-wonke nezibane ezikwizibonda eziphakamileyo ukuphucula ukhuseleko.
10. Kuseka amaqela awodwa amagcisa aphenhula ngokukhawuleza kwiimpazamo zombane, ukucima, ukusilela kweziguquli-mbane nokonakala kweziseko, ngexesha lokuphendula kwimeko yongxamiseko elingadluliyo kwiyre enye.
11. Kwenza zonke iziseko zombane zikamasipala zibe kwinkqubo yedijithali—kuquka izikhululo, iziguqulimbane, imigca yokuhambisa, iindawo zeemitha noqhagamshelo lweenkonzo—kusetyenziswa iinkqubo ezidityanisiweyo zokubeka iliso ezikrelekrele ukuze kufunyaniswe iimpazamo, kubekwe iliso kukonakaliswa, kuchongwe ukuphazanyiswa kwezixhobo kwaye kuphuculwe ulondolozo nocwangciso.
12. Kubonelela ngenkxaso ejoliswe kumakhaya ajongene nobunzima bezemali, iinkqubo zokuwanceda aphume ematyaleni namalungiselelo entlawulo afikelelekayo.
13. Kuthintela ukunqunyanyiswa kombane okungeyomfuneko kumakhaya athatha inxaxheba kwiinkqubo ezivunyiweyo zokunciphisa nokulungisa amatyala.
14. Kuphuhlisa isakhono sikamasipala sokuvelisa umbane, kuquka iiprojekthi zoluntu zamandla ahlaziyekayo, ngentsebenziswano no-Eskom namanye amaziko oluntu.
15. Kusebenzisa ukuveliswa kombane ngumasipala ukunciphisa iindleko zombane, ukomeleza ukhuseleko lwamandla nokuxhasa uphuhliso lwezozoqosho lwasekuhlaleni nokwakhiwa kwamashishini.

j) Uqoqosho nokuVuselelwa kwaMashishini

Oomasipala be-EFF baza:

1. Kuqhuba ukwakhiwa kwamashishini asekuhlaleni ukuze oomasipala baguquke ekubeni ngamaziko okusebenzisa izinto kuphela, babe ngamaziko emveliso, engqesho nemisebenzi yezozoqosho.
2. Kufuna ukuba amaziko ezemali abonelele ngeeasethi ezimiselweyo, kuze kuqinisekiswa ukuba ubuncinane i-80% yezinto ezithengwa ngumasipala ziveliswa okanye zifumaneka ekuhlaleni.
3. Kukhuthaza ukusetyenziswa kwee-asethi ezimiselweyo neendlela zenkxaso-mali yophuhliso ukuze utyalo-mali lujoliswe kwiziseko



zikamasipala, ekwakhiweni kwamashishini nakuqoqosho lwasekuhlaleni oluvelisayo.

4. Kuhlengahlengisa ii-Arhente zoPhuhliso zooMasipala ukuze zixhase ukwakhiwa kwamashishini, uphuhliso lwezoqoqosho lwasekuhlaleni nokudalwa kwemisebenzi.
5. Kuseka iipaki zamashishini ezilokishini nasemaphandleni ezijolise ekuveliseni, ekulungisweni kweemveliso zezolimo, kwizinto zokwakha, kwiinkonzo zokulungisa nakwamanye amacandelo avelisayo.
6. Kuqinisekisa ukuba yonke imimandla yoQoqosho oluKhethekileyo (SEZs) neepaki zamashishini zikamasipala zidityaniswe nothungelwano lwezothutho zikawonke-wonke olufikelelekayo.
7. Kuphuhlisa amaziko emveliso angawoomasipala, iindawo zokusebenza ekwabelwana ngazo neziseko zamashishini ukuxhasa ii-SMME, ookopolotyeni namashishini asakhulayo.
8. Kuxhasa ukulungiswa kweemveliso zezolimo namakhonkco emveliso asekuhlaleni adibanisa amafama, abavelisi, abalungisi neemarike kushishino lweziquhamo zesitrasi eGreater Giyani, eGreater Tzaneen nase-Elias Motsoaledi.
9. Kwandisa amathuba okuba abantu abaNtsundu, abasetyhini nolutsha bathathe inxaxheba kwimveliso, kubunini nakwimisebenzi yezoqoqosho.

k) UkuHlaliswa kwaBantu

Oomasipala be-EFF baza:

1. Kusebenzisa izicwangciso ezinamaxesha acacileyo zokuphelisa umva kwizindlu, zibe neethagethi zonyaka, uluhlu lokulinda oluselubala nezicwangciso zokunikezela ezilandelela lula, ngentsebenziswano noorhulumente bamaphondo nowesizwe.
2. Kuphuhlisa nokwabela amakhaya afanelekileyo iziza esele zineenkonzo njengempendulo ekhawulezileyo kwingxaki yezindlu, ngoxa kuqhutyekwa nezisombululo zezindlu zexesha elide.
3. Kuseka uluhlu olukhethekileyo lwezindlu lwabantu abakhubazekileyo ukuze iimfuno zabafaki-zicelo zirekhodwe kwaye zilandelwe, kuqinisekise ukuba bafumana izindlu ezihambelana neemfuno zabo.
4. Kucanda ngokutsha, kwenze zibe semthethweni kwaye kuphucule iindawo zamatyotyombe, kuqinisekise ukufikelela kwiinkonzo ezisisiseko, iindlela, iziseko zokuhambisa amanzi emvula namalungelo akhuselekileyo okuhlala.
5. Kubeka phambili iziza ezineenkonzo neendawo zokuhlala ezidityanisiweyo apho ukwakhiwa kwezindlu kwangoko kulibazisekile.



6. Kuseka nokomeleza amaziko oluntu ezindlu zentlalo ukuze aphuhlise, abe ngabanini kwaye alawule izindlu ezirentwayo ezifikelelekayo kubasebenzi, abantu abafumana umvuzo ophakathi nabafundi.
7. Kulawula nokuxhasa iinkqubo zezindlu ezifikelelekayo kumakhaya angafanelekelanga izindlu zasimahla kodwa angenakho ukufumana inkxaso-mali yezindlu yabucala.
8. Kuqhuba uphicotho olubanzi lomhlaba nezindlu ukuze kuchongwe umhlaba ongasetyenziswayo, iiprojekthi ezishiyiweyo, izakhiwo ezithinjwe ngokungekho mthethweni namathuba ophuhliso.
9. Kugqiba zonke iiprojekthi zezindlu ezimileyo nezishiyiweyo ngokungenelela ngqo kukarhulumente, ulawulo olomeleleyo lweeprojekthi nokuphendulisa ngokungqongqo.
10. Kuseka iinkqubo eziselubala nezibekwe kwindawo enye zokwabiwa kwezindlu, kukhawuleziswe ukukhutshwa kwamaxwebhu obunini kuze kupheliswe urhwaphilizo ekunikezelweni kwezindlu.
11. Kuthintela ukugxothwa kwabantu ngokungekho mthethweni nokuqinisekisa ukuba bafumana enye indawo yokuhlala xa kufuneka bafuduswe.
12. Kuguqula izakhiwo ezingasetyenziswayo nezithinjwe ngokungekho mthethweni zibe zizindlu ezikhuselekileyo, ezilawulwayo nezifikelelekayo apho kufanelekile.
13. Kubeka phambili uphuhliso lwezindlu zabantu abanemivuzo eyahlukeneyo kwiindawo zasezidolophini ezikwindawo efanelekileyo, ukuze kubuyiswe umva ucando-mhlaba localucalulo nokunciphisa ukungalingani.
14. Kwakha isakhono sangaphakathi sikamasipala sokwakha, kuncitshiswe ukuxhomekeka kwiikontraka, kuze kunyanzeliswe iziphumo ezingqongqo kumsebenzi okumgangatho ophantsi, urhwaphilizo nokushiywa kweeprojekthi.
15. Kwabela izindlu kubo bonke abantu abakhubazekileyo kwiinyanga ezili-12 zokuqala.

I) EzokuLoba

Oomasipala be-EFF baza:

1. Kuqulunqa izikhokelo zophuhliso loqoqosho lolwandle kwimimandla eselunxwemeni ukuze izixhobo zolwandle zinike uluntu lwasekuhlaleni inzuzo enkulu kwezoqoqosho kwiindawo ezifana neKnysna neMossel Bay eNtshona Koloni, iNgquza Hill eMpuma Koloni nePort Nolloth eNorthern Cape.



2. Kwakha iimarike zeentlanzi ezifikelekayo ezineendawo zokuthengisa zasekuhlaleni ezilungiselelwe ukusetyenziswa ngabantu abakhubazekileyo.
3. Kusungula ubuncinane iprojekthi enye yokufuya izinto eziphila emanzini, engabahlali, zingaphelanga iminyaka emibini ukuze kudalwe imisebenzi ezinzileyo, ngakumbi kulutsha.
4. Kuseka iiNgxowa-mali zoPhuhliso lwezoLoba zooMasipala ukunceda abalobi bomthonyama nabemveli ngezikhuphe, izixhobo zokuloba, indawo yokugcina ebandayo, amaziko okulungisa iimveliso neziseko zokupakisha.
5. Kusebenzisana norhulumente wesizwe ukuqinisekisa ukuba abalobi basekuhlaleni kwiindawo ezifana neNgquza Hill—kuquka iMsikaba, iMbotyi, iGrosvenor, iMkambathi neNdlambe eMpuma Koloni —iKnysna eNtshona Koloni nePort Nolloth eNorthern Cape babandakanywa ngokubonakalayo kuqoqosho lokuloba.
6. Kuphuhlisa amashishini okufuya izinto eziphila emanzini nawokuloba emanzini acocekileyo kwiinkqubo zamanzi ezingaphakathi elizweni, kuquka iGariep Dam, iVaal Dam neBloemhof Dam eFree State, kunye neNandoni Dam, iFlag Boshielo Dam neTzaneen Dam eLimpopo, ukuze kwandiswe ukuveliswa kokutya, kudalwe imisebenzi kwaye kuxhaswe uqoqosho lwasekuhlaleni.
7. Kunceda amashishini amancinane okuloba nawokufuya izinto eziphila emanzini ukuba abhalise, athobeke imithetho kwaye afikelele kwiimarike, kwinkxaso-mali nakuncedo lobugcisa.

m) Amanzi, okusiNgqongileyo noTshintsho lweMozulu

Oomasipala be-EFF baza:

1. Kudibanisa ukuziqhelanisa notshintsho lwemozulu nokuzinza kokusingqongileyo kuzo zonke izicwangciso neeprojekthi zophuhliso zikamasipala.
2. Kuqinisekisa ukuba imigaqo-nkqubo nezigqibo zikamasipala zomeleza ukukwazi ukumelana notshintsho lwemozulu kwaye zinciphisa ukuba sesichengeni kweengozi zokusingqongileyo, ezoqoqosho nezemozulu.
3. Kubonelela ngezaphulelo namanye amancedo kwiirhafu zikamasipala kumakhaya namashishini atyala imali kumandla ahlaziyekayo nakubuchwepheshe obugcina indalo.
4. Kuseka iindawo zikamasipala zokukhulisa izityalo zomthonyama nokomeleza ukukhuselwa kweentlobo-ntlobo zezityalo nezilwanyana.



5. Kuseka amaqela akhethekileyo okukhusela iziseko zendalo ezifana nemigxobhozo, imilambo, iindawo eziluhlaza neendawo ezibuthathaka kokusingqongileyo, kuquka ezo zisemngciphekweni wokukhukuliseka komhlaba.
6. Kwakha kwaye kugcine iipaki, iindawo eziluhlaza namaziko emfundo ngokusingqongileyo ukukhuthaza ulwazi ngendalo nentlalo-ntle yoluntu.
7. Kulungisa ukuvuza kwamanzi ngokukhawuleza emva kokuxelwa nokuseka amaqela akhethekileyo abatywini bakamasipala kwiindawo ezinokuvuza okuninzi.
8. Kucima amatyala amanzi aqokelelwe ngenxa yeebhili ezingachanekanga nokubonelela ngoncedo lwamatyala kumakhaya asesichengeni, kuquka abadla umhlala-phantsi nabantu abakhubazekileyo.
9. Kuqinisekisa ukuba ikhaya ngalinye lifumana amanzi abalekayo acocokileyo, akhuselekileyo nathembekileyo.
10. Kwakha izindlu zangasese zikawonke-wonke neeyunithi zogutyulo ezineminyango ebanzi, iindlela ezithambekileyo zokungena nendawo eyaneleyo yokujika izitulo ezinamavili.
11. Komeleza ulawulo lukamasipala kwiziseko zokuhambisa amanzi nokuphucula ulawulo, ulondolozo nokunikezelwa kweenkonzo zamanzi.
12. Kuqesha ngokuthe ngqo iinkonzo zeelori zamanzi nokunciphisa ukusetyenziswa kwazo ukuze zisetyenziswe kuphela kwiimeko zongxamiseko.
13. Kuqinisekisa ukuba ngexesha lokuncitshiswa kwamanzi okanye lembalela, iilori zamanzi ziwahambisa ngqo emakhayeni abantu abakhubazekileyo ngaphandle kokuba balinde kwimigca yoluntu.

n) Ugutyulo noLawulo lwaManzi aMdaka

Oomasipala be-EFF baza:

1. Kuphelisa zonke izindlu zangasese zamabhakethi nezemingxuma ezingakhuselekanga nokuqinisekisa ukuba wonke umntu ufumana iinkonzo zogutyulo ezinesidima.
2. Kudibanisa amakhaya kwiinkqubo zogutyulo ezisebenzayo nokubonelela ngobunye ubuchwepheshe bogutyulo apho uqhagamshelo oluqhelekileyo lungenakwenziwa ngoko nangoko.
3. Kuqinisekisa ukuba zonke izikolo, iikliniki namaziko oluntu aneenkonzo zogutyulo ezikhuselekileyo, ezicocokileyo nezithembekileyo.



4. Kubonelela ngeendawo zogutyulo zoluntu ezikhuselekileyo, ezinezibane nezilondolozwe kakuhle kwiindawo zamatyotyombe njengenyathelo lethutyana ngoxa kuphuhliswa iinkonzo ezisisigxina.
5. Kuseka amaqela olondolozo aphenhla ngokukhawuleza ekuvalekeni kwemijelo yelindle, ukuvuza, ukuphuphuma nokusilela kweenkonzo zogutyulo.
6. Kuphucula, kulungisa kwaye kwanise iziseko zokucocwa kwamanzi amdaka ukuthintela ungcoliseko lwelindle nokukhusela impilo yoluntu.
7. Kwakha kwaye kugcine izindlu zangasese zikawonkewonke ezicocekileyo, ezikhuselekileyo nezifikelekayo kumaziko ezothutho, kwiimarike, kwiipaki, kumaziko olonwabo nakwezinye iindawo zoluntu.
8. Komeleza ukuthotyelwa kwemigangatho yesizwe yomgangatho wamanzi nolawulo lwamanzi amdaka.
9. Kutyala imali kuphando, kwizinto ezintsha, kuphuhliso lwezakhono nakubuchwepheshe bale mihla ukuphucula iinkqubo zogutyulo namanzi amdaka.
10. Kwakha oomasipala abacocekileyo, abasempilweni nabanesidima apho iinkonzo zogutyulo zikhusele impilo yoluntu, indalo nentlalo-ntle yabahlali.

o) Oomasipala be-EFF ngokuQokelelwa kweNkunkuma, uLawulo lweNkunkuma nokuCoceka kokusiNgqongileyo

Oomasipala be-EFF baza:

1. Kuqinisekisa iinkonzo ezithembekileyo zokuqokelelwa kwenkunkuma kulo lonke uluntu nokubonelela ngeziseko ezaneleyo zokulahla inkunkuma kwiindawo zikawonke-wonke, ezilokishini, kwiindawo zamatyotyombe nakwiindawo ezinabantu abaninzi.
2. Kuphelisa ukulahlwa kwenkunkuma ngokungekho mthethweni ngokunyanzelisa umthetho, iinkqubo zokucoca rhoqo neziseko eziphucukileyo zolawulo lwenkunkuma.
3. Kwamkela nokusebenzisa iPhulo lika-Andries Tatane njengenkqubo ekhethekileyo yokuchonga, ukucoca nokubuyisela kwimeko entle iindawo zokulahla inkunkuma ngokungekho mthethweni, ngoxa kukhuthazwa ukuthatha inxaxheba koluntu.
4. Kuvavanya, kulungisa kwaye kwanise iindawo zokulahla nokudlulisa inkunkuma ukuze zithobe imigangatho yokusingqongileyo nokhuseleko.



5. Kuqesha ngokuthe ngqo abasebenzi bokuqokelela nokulawula inkunkuma ukuze komelezwe isakhono sikamasipala nokunciphisa ukuxhomekeka kwiikontraka.
6. Kubandakanya abaqokeleli bezinto ezinokuphinda zisetyenziswe, ookopolotyeni namashishini okurisayikilisha kwiinkqubo ezisemthethweni zikamasipala, kubonelelwe ngomvuzo ofanelekileyo namathuba ezoqoqosho azinzileyo.
7. Kutyala imali ekurisayikilisheni, ekwenzeni inkunkuma ibe luncedo nakwiinkqubo zoqoqosho olusebenzisa izinto ngokuphindaphindiweyo ukuze kuncitshiswe ukuxhomekeka kwiindawo zokulahla inkunkuma nokudala imisebenzi ezinzileyo.
8. Kutyala imali kuphando, kwizinto ezintsha, kuphuhliso lwezakhono nakubuchwepheshe bale mihla ukuphucula ukuqokelelwa nolawulo lwenkunkuma.
9. Kusebenzisa iinkqubo zolawulo lwenkunkuma nezokusingqongileyo ukudala imisebenzi ezinzileyo kuluntu lwasekuhlaleni.
10. Kwakha oomasipala abacocekileyo, abasempilweni nabanesidima, apho iinkqubo zolawulo lwenkunkuma zikhusela impilo yoluntu, indalo nentlalo-ntle yabo bonke abahlali.

p) Ulwaphulo-mthetho, uRhwapphilizo noKhuseleko loLuntu lukaMasipala

Oomasipala be-EFF baza:

1. Kuphucula zonke izikhululo zamapolisa zasekuhlaleni, amaziko okhuseleko neenkundla zikamasipala ngeendlela zokungena ezithambekileyo, iingcango ezizivulelayo, iikhawuntara eziphantsi neendawo zokugcina abantu ezifikelekelayo.
2. Komeleza amandla okunyanzelisa umthetho kamasipala ngokwandisa abasebenzi, uqeqesho nezixhobo. Baza kunceda oomasipala basebenzise iindlela ezifanelekileyo, ezifana namasebe awodwa, iinkonzo ekwabelwana ngazo okanye iyunithi eziqinisiweyo zokunyanzelisa imithetho kamasipala.
3. Kusebenzisana neNkonzo yamaPolisa yaseMzantsi Afrika nabanye abachaphazelekayo ukuqulunqa izicwangciso ezidityanisiweyo zokuthintela ulwaphulo-mthetho ezisekelwe kwiindawo ezichongiweyo ezinolwaphulo-mthetho oluninzi.
4. Kusebenzisa iNkqubo ejoliswe ekuPhenduleni kuBundlobongela obuSekelwe kwiSini nokuBulawa kwabaseTyhini kwiSikhululo samaPolisa



- saseThohoyandou, esirekhode elona nani liphezulu lamatyala odlwengulo.
5. Kusebenzisa iNkqubo kaMasipala oKhuselekileyo egxile ekuthinteleni ulwaphulo-mthetho, ekunyanzeliseni imithetho kamasipala nasekwenzeni iindawo zoluntu zikhuseleke.
 6. Komeleza nokwandisa amaqonga asekuhlaleni okuthintela ulwaphulo-mthetho ukuze kuphuculwe intsebenziswano phakathi koomasipala, uluntu, amaqumrhu obupolisa boluntu namaziko okunyanzelisa umthetho. Lo msebenzi uza kubekwa phambili eMzumbe (iWadi 19), eMlazi (iiWadi 76 nama-78), eMaphumulo (iWadi 4), eMshwathi, eMandeni, eThekwini Outer West (iiWadi 2, 4, 5, 8 nama-91), eThekwini Far North (iiWadi 59, 102 ne-112) naseThekwini Central KwaZulu-Natal; eBreede Valley, eMitchells Plain nasePhilippi kwisiXeko saseKapa eNtshona Koloni; nakwisiXeko saseJohannesburg eGauteng.
 7. Kuxhasa amalinge okukhokelwa luluntu okuthintela ulwaphulo-mthetho ngokuwanika amaziko kamasipala, intsebenziswano nezinye iindlela ezifanelekileyo zoncendo.
 8. Kuseka iinkundla zikamasipala ukuphucula ukunyanzeliswa kwemithetho kamasipala nokunciphisa ukulibaziseka kolawulo lobulungisa.
 9. Kusebenzisa ubuchwepheshe bale mihla bokulwa ulwaphulo-mthetho, kuquka iikhamera ze-CCTV, iidroni, iinkqubo zokubona izithonga zemipu namaziko okubeka iliso ngexesha lokwenzeka kweziganeko.
 10. Kuseka iinkqubo ezikhethekileyo zokhuseleko lwasemaphandleni ukulwa ukubiwa kwemfuyo, ukonakaliswa kweziseko nolunye ulwaphulo-mthetho eMatatiele, eNtabankulu, eMbhashe nakuMasipala waseWinnie Madikizela-Mandela eMpuma Koloni; eMzimkhulu, eJozini naseMhlabuyalingana KwaZulu-Natal; eNgwathe, eMafube naseKopanong eFree State; eRamotshere Moiloa naseDitsobotla eNorth West; eMusina naseMakhuduthamaga eLimpopo; naseJoe Morolong naseGa-Segonyana eNorthern Cape.
 11. Kuqhuba uphicotho lwendlela yokuphila kwamagosa kamasipala nokunyanzelisa iziphumo ezingqongqo kurhwaphilizo nakwizenzo ezingalunganga kulawulo lukamasipala.
 12. Kwakha oomasipala abakhuselekileyo nabalawulwa kakuhle abakhusela abahlali, amashishini neziseko zoluntu.



q) UPhuhliso nokuXhotyiswa koLutsha

Oomasipala be-EFF baza:

1. Kugcina iinkcukacha eziqinisekisiweyo zolutsha olungaphangeliyo ukuze kuqinisekiswe ukufikelela ngobulungisa nangokuselubala kwimisebenzi kamasipala, uqeqesho, iibhasari neenkqubo zenkxaso yezoshishino.
2. Kuqinisekisa ukuba ubuncinane i-40% yamathuba engqesho kamasipala abelwa ulutsha oluneminyaka eli-18 ukuya kwengama-35, ngakumbi kwiziseko, kwiinkonzo zobugcisa, kulawulo lwenkunkuma, kumandla, emanzini nakwiinkonzo zoluntu.
3. Kwabela ubuncinane i-50% yamathuba okuthenga kamasipala kumashishini nookopolotyeni bolutsha ngenkxaso ejoliswe kubo, ukwahlulwa kwezivumelwano neenkqubo zokuhlawula ngokukhawuleza.
4. Kuqeqesha ulutsha ukuze lube ngamagcisa, amagcisa obugcisa nabanye abasebenzi abanezakhono ngeenkqubo zikamasipala zoqeqesho lomsebenzi, amava omsebenzi nophuhliso lwezakhono.
5. Kubonelela ulutsha olungaphangeliyo nabaphumelele ibanga le-12 ngoqeqesho lwasimahla lokuqhuba kunye nethuba elinye lokwenza uvavanyo lwephepha-mvume lokuqhuba.
6. Kuseka amaZiko amaThuba oLutsha neenkonzo zenkxaso ezisekelwe kwiwadi ezinika isikhokelo semisebenzi, inkxaso yezoshishino nengqesho, ukufikelela kwidijithali noncedo lwezicelo zemisebenzi, uqeqesho noshishino.
7. Kuhlengahlengisa iinkqubo zengqesho yolutsha zikamasipala, ezifana ne-Expanded Public Works Programme (EPWP), ukuze zibandakanye imisebenzi efanele ulutsha olunokukhubazeka ngokwasemzimbeni.
8. Kubeka iitoliki eziqeqeshiweyo zoLwimi lweZandla lwaseMzantsi Afrika (SASL) kwimiboniso yemisebenzi, kwiindibano zocweyo zolutsha nakwiindibano zoshishino ezisingathwa ngumasipala.
9. Komeleza iinkqubo zokuthintela ukusetyenziswa gwenxa kweziyobisi lulutsha nokuxhasa amalinge oluntu okubuyisela abantu kwimeko entle ngamaziko kamasipala nangenkxaso yemibutho yoluntu.
10. Kubonelela oosomashishini abatsha, abarhwebi abangekho sesikweni nookopolotyeni ngeendawo zokurhweba, amaziko kamasipala, iziseko neenkonzo zenkxaso yezoshishino.
11. Kubeka phambili iibhasari zikamasipala zezakhono ezingabileyo nezobugcisa nokuqinisekisa ukuba abaphumeleleyo banegalelo ekwakheni isakhono sikamasipala.



12. Kusebenzisa izikhuthazi, iimvume neenkqubo zophuhliso lwezoqoqosho zikamasipala ukukhuthaza ukuqeshwa kolutsha ngakumbi kuqoqosho lwasekuhlaleni.
13. Kupapasha rhoqo iingxelo ngengqesho yolutsha, ukuthenga, uqeqesho, iibhasari nophuhliso lwamashishini ukuqinisekisa ukuselubala nokuphendula.

r) EzoThutho

Oomasipala be-EFF baza:

1. Kugcina zonke iindlela zikamasipala zikhuselekile kwaye zisebenziseka, nokugalela umphezulu oqinileyo ngokuthe chu kwiindlela zegrabile ukuze zifikeleleke kuzo zonke iimeko zemozulu, kwiindawo ezifana neMogale City neRand West eGauteng, neKhayama eNorthern Cape.
2. Kuqinisekisa ngokungxamisekileyo ukufakwa ngokutsha kwegrabile kwi-R524 ukusuka eLouis Trichardt/Makhado, idlule eThohoyandou ukuya kwiPunda Maria Gate yeKruger National Park.
3. Kubeka phambili ukugcinwa nokuphuculwa kweendlela eziya ezikolweni, kwiikliniki, emangcwabeni, kumaziko ezoqoqosho nakwezinye iindawo zoluntu.
4. Kuqinisekisa ukuba izikhululo zeeteki namanye amaziko ezothutho zikawonke-wonke acocile, akhuselekile kwaye anamanzi, ugutyulo neenkonzo zokususa inkunkuma.
5. Kufakela zonke izithuthi zikawonke-wonke zikamasipala izibhengezo ngelizwi nezikrini zedijithali ezibonakalayo ezichaza ngokucacileyo izikhululo neendlela ezilandelayo.
6. Kwenza intsebenziswano esemthethweni nemibutho yeeteki ukuze ilawule ngokubambisana izikhululo zeeteki, amaziko oluntu neziseko zabakhweli ngendlela exhasa izithuthi zikawonke-wonke ezikhuselekileyo nezisebenza kakuhle.
7. Kulungelelanisa izikhululo zeeteki namaziko ezothutho njengeendawo zorhwebo ezicwangcisiweyo ezixhasa abarhwebi abangekho sesikweni noqoqosho lwasekuhlaleni.
8. Kusebenzisa iinkqubo eziselubala nezisebenza kakuhle zokukhupha iimvume zeeteki nezinye iimvume zezothutho zikamasipala.
9. Kufakela iziseko zokhuseleko zale mihla—kuquka izibane, iinkqubo zokubeka iliso namanyathelo okhuseleko—kwizikhululo zeeteki, zeebhasi nezololiwe.



10. Kwandisa iinkonzo zezothutho zikawonke-wonke ezithembekileyo nezifikelelekayo, kuquka iinkonzo zeebhasi zikamasipala nezekhonthrakthi, ngakumbi ezilokishini nasemaphandleni.
11. Kuqinisekisa ukuba iitekisi azihluthwa ngokungeyomfuneko okanye ngokungekho mthethweni ngamagosa okunyanzelisa umthetho kamasipala.
12. Kubonelela ngenkxaso-mali yokucoca nokugcina amaziko kwimibutho yeeteksi, ookopolotyeni namashishini oluntu alawula izikhululo zeeteksi, izindlu zangasese zoluntu namaziko abakhweli.
13. Kubonelela abadla umhlala-phantsi, abantu abakhubazekileyo nabantu abangaphangeliyo ngenkxaso yezothutho ekhuselekileyo, ethembekileyo nexhaswa ngemali.
14. Kubonelela abantu abadala abafumana izibonelelo ze-SASSA ngezothutho ezikhuselekileyo nezithembekileyo xa besiya kuthatha imali yabo yomhlala-phantsi nezibonelelo zentlalo.
15. Kuqhuba rhoqo uphicotho lweziseko zezothutho zikamasipala nezivumelwano ezinxulumene nazo ukuqinisekisa ukuba izixhobo zoluntu zixhasa iinkonzo, uphuhliso lwezoqoqosho neemfuno zoluntu.
16. Kuvuselela nokugcina izikhululo zeenqwelo-moya zikamasipala nokuphuhlisa iziseko zeenqwelo-moya zomlinganiselo omncinane apho kufanelekile.
17. Kuphendulisa oosodolophu, amalungu eekomiti zoosodolophu namagosa kamasipala ngemeko yeendlela, iziseko zezothutho namaziko ezothutho zikawonke-wonke.
18. Kunyanzelisa imithetho kamasipala ukuqinisekisa ukuba bonke abaqhubi bezothutho basebenza ngokusemthethweni nangoxanduva, bekhusele abakhweli, amashishini noluntu.

s) Iziseko zikaMasipala

Oomasipala be-EFF baza:

1. Kwakha ngokutsha isakhono sangaphakathi ngokuqesha oonjineli, abacwangcisi beedolophu, abayili bezakhiwo, amagcisa, abatywini, amagcisa obugcisa nabanye abasebenzi abanezakhono zokucwangcisa, ukwakha nokugcina iziseko.
2. Kuphelisa ukukhutshelwa ngaphandle kweenkonzo ezibalulekileyo zeziseko nokuseka amaqela asisigxina kamasipala ajongene neendlela, amanzi, ugutyulo, amanzi emvula namaziko oluntu.



3. Kusungula inkqubo enkulu yokwakha ngokutsha iziseko ukuze kusionjululwe umva kwiindlela, emanzini, kugutyulo, kwiinkqubo zamanzi emvula nakumaziko oluntu.
4. Kusebenzisa uphuhliso nokugcinwa kweziseko njengendlela enkulu yokudala imisebenzi, kugxilwe kubasebenzi basekuhlaleni, abasetyhini nolutsha.
5. Kugcina nokuphucula iindlela zikamasipala, iibhlorho, iirobhothi, izibane zezitalato, iimpawu zendlela neenkqubo zamanzi emvula ukuqinisekisa ukuhamba kwabantu nempahla okukhuselekileyo nokuthembekileyo.
6. Kulungisa, kwandise kwaye kugcine iziseko zamanzi —kuquka imibhobho, amadama okugcina amanzi namaziko okucoca— ukuqinisekisa unikezelo lwamanzi oluthembekileyo nokuphelisa ilahleko ebangelwa kukuvuza nolondolozo olugwenxa.
7. Kuphucula nokugcina iziseko zogutyulo, kuquka imijelo yelindle namaziko okucoca amanzi amdaka, ukuphelisa ukuphuphuma kwelindle nokuqinisekisa iinkonzo zogutyulo ezinesidima kulo lonke uluntu.
8. Kubeka phambili uphuhliso lweziseko kwiindawo zamatyotyombe, ezilokishini, emaphandleni nakwezinye iindawo ezazingahoywanga ngaphambili.
9. Kugcina nokuphucula iziseko kwiindawo zokuhlala, zorhwebo nezamashishini ukuxhasa amakhaya, amashishini neengcali, nokukhulisa uqoqosho lwasekuhlaleni.
10. Kuqinisekisa ukuba iziseko zikamasipala zixhasa ukwakhiwa kwamashishini, utyalo-mali, ukukhula kogoqosho nokwandiswa kwamashishini asekuhlaleni.
14. Kuqinisekisa ukuba utyalo-mali kwiziseko luhambelana nocwangciso lwendawo, ukuhlaliswa kwabantu okudibeneyo neenjongo zophuhliso lukamasipala zexesha elide.

F. UHLAHLO-LWABIWO-MALI NOKUXHASWA NGEMALI KWOOMASIPALA BABANTU BE-EFF

Urhulumente wasekhaya ujongene nengxaki ebangelwe lulawulo olugwenxa nenkcitho yemali koomasipala abakhokelwa yi-ANC, i-DA ne-IFP, nto leyo ethintela ukunikezelwa kweenkonzo ngendlela efanelekileyo. Kufuneka indlela entsha yokwenza uhlahlo-lwabiwo-mali nokufumana inkxaso-mali, yokomeleza isakhono solawulo nokuqinisekisa ukuba iinkokeli zibeka uluntu phambili.

Oomasipala ngoku bafumana malunga ne-9% yemali eyabelwa yiPalamente koorhulumente wesizwe, wamaphondo nowasekhaya. I-EFF iza kuqhubeka ikhuthaza ePalamente ukuba esi sabelo sonyuswe sifikelele ubuncinane kwi-15%,



nto leyo eya kwenza kufumaneka izixhobo ezingakumbi zeenkondo ezibalulekileyo ezifana neendlela, amanzi, umbane nezindlu.

OoMasipala baBantu be-EFF baza kuseka iiYunithi zobuGcisa zokuJonga iziBonelelo zeZiseko. Ezi yunithi ziza kuba noonjineli, abayili bezakhiwo, abacwangcisi beedolophu, amagcisa nabahlalutyi bezemali abasebenza ngokusisigxina ukuqinisekisa ukuba imali yezibonelelo zeziseko, edla ngokulahleka ngenxa yokungalungelelaniswa kakuhle norhwaphilizo, isetyenziswa ngendlela efanelekileyo.

OoMasipala baBantu be-EFF baza kusebenzisana namashishini ekwakheni iindlela, iinkqubo zamanzi, umbane, izindlu neziseko zedijithali, ngoxa ezi asethi zihlala zisezandleni nasebumnini babantu.

OoMasipala baBantu be-EFF baza kwenza izivumelwano namashishini asekuhlaleni ukuze axhase ukugcinwa kweziseko, kuquka ukulungiswa kweepavumente nemingxuma ezindleleni, ukubekwa kwemigqomo yenkunkuma kumashishini nokucocwa kweendawo zoluntu.

Baza kwabela nemibutho yeeteki imali yokucoca nokugcina izikhululo zeeteki, iindlela zezothutho nezindlu zangasese zoluntu. Ukongeza, ooMasipala baBantu be-EFF baza kuqokelela imali etyalwa ngamashishini amakhulu nangamasebe karhulumente.

Iibhiliyoni zeerandi zilahleka minyaka le ngenxa yokuchithwa kwamanzi nombane okubangelwa ziziseko ezingagcinwanga kakuhle. OoMasipala baBantu be-EFF baza kulungisa iziseko baze bafake iimitha ezikrelekrele ukukhusela ingeniso kamasipala.

Ngokutsho koMphicothi-zincwadi Jikelele woMzantsi Afrika, oomasipala bachithe ngaphezu kwe-R1.6 yeebhiliyoni kubacebisi kunyaka-mali wama-2024/25. OoMasipala baBantu be-EFF baza kubeka phambili ukwakha isakhono sangaphakathi ngokuqesha iingcali ezifanelekileyo endaweni yokuxhomekeka kubacebisi, ukuqinisekisa ukuba imali yoluntu isetyenziswa kakuhle.

OoMasipala baBantu be-EFF baza kunika abanini bamashishini umhlaba simahla ukuze bakhe iifektri badale imisebenzi, ngenjongo yokunyusa ingeniso kamasipala.



G. ISIPHELO

Namhlanje uMzantsi Afrika ujongene nokhetho olungenakuphinda luhlehliswe. Lukhetho phakathi koLoyiso okanye uKufa. Ukuwa koomasipala bethu nokusilela korhulumente wasekhaya eMzantsi Afrika asingombandela nje wemibhobho eyaphukileyo, imingxuma ezindleleni, ukuqokelelwa kwenkunkuma, amanzi nombane.

Kumalunga nobomi bemihla ngemihla namava okwenene abantu bethu. Kumalunga nomama waseGiyani ongakwaziyo ukuhlamba nokuphekela abantwana bakhe kuba kungekho manzi. Kumalunga nolutsha lwaseSoweto naseMamelodi olungakwaziyo ukufumana imisebenzi kumasipala kuba aluqhagamshelananga nabezopolitiko. Kumalunga nentombazana yaseMthatha enyanzelwa ukuba ilale noceba wasekuhlaleni okanye usodolophu ukuze ifumane umsebenzi. Kumalunga nolutsha lwaseKhayelitsha naseMitchells Plain oluye lwanikezela kwiziyobisi notywala ngenxa yentswela-ngqesho.

Kumalunga nabasebenzi nabadla umhlala-phantsi baseRustenburg abahlawulela iinkonzo abangazifumaniyo. Kumalunga nabantwana baseMangaung abadlula kwilindle eliphuphumayo nakwiindlela ezinemingxuma xa besiya esikolweni.

Abantu bethu eMlazi naseKwaMashu beve izithembiso ezaneleyo. Abantu bethu eNkomazi naseMbombela bamamele iintetho ezaneleyo. Abantu bethu bafunde iimanifesto ezaneleyo. Into efunwa nguMzantsi Afrika ngoku sisibophelelo sokwenene.

Izibophelelo ezikule manifesto asizozithembiso nje ezingenanto. I-EFF iyazi ukuba abantu bethu badiniwe zizithembiso. Ezi zizibophelelo i-EFF eza kuzilandela ngoqeqesho, ngokuthembeka nangokuzimisela.

Le manifesto sisibhengezo sokuba urhulumente wasekhaya unako ukusebenza. Sisibhengezo sokuba oomasipala banako ukuba ngamaziko agqwesileyo anikezela iinkonzo ebantwini ngaphandle korhwaphilizo.

Zonke izibophelelo ezikule manifesto ziyasebenza kwaye zinokulinganiswa.

Ezi zizibophelelo zokuqinisekisa ukuba akukho mntwana ukhulela e-Emfuleni ecinga ukuba ilindle ezitalatweni yinto eqhelekileyo; akukho sapho lwaseLusikisiki olwamkela ubumnyama njengemeko esisigxina; kwaye akukho luluntu



IwasePolokwane nasePhokwane lunyanzelwa ukuba luphile ngaphandle kweenkonzo ezisisiseko nesidima.

Inyaniso yeyokuba ayinakubakho inkululeko yokwenene ngaphandle koomasipala abasebenzayo. Asinakubakho isidima apho amanzi angahambiyo, umbane ungathembekanga, iindlela zingakhuselekanga neekliniki zingakwazi ukunceda abagulayo.

Isibophelelo ngasinye esikule manifesto sinobunzima. Sisibophelelo sokubuyisela ukuphendula apho kuye kwaphela, nokuqinisekisa ukuba ubukho borhulumente wasekhaya abubonakali kwiintetho okanye kwizilogeni, kodwa kumava emihla ngemihla abantu abaqhelekileyo.

Umsebenzi ongaphambili awuyi kuba lula. Uza kuchaswa ngabo baxhamla ekuweni koomasipala bethu. Uza kuchaswa ngabo baxhamla kwintlungu nokubandezeleka kwabantu bethu. Uza kuchaswa ngabo baxhamla kwimeko ekhoyo ngoku.

Bantu base-Ekurhuleni, eJohannesburg, eTshwane, eMangaung naseNelson Mandela Bay. Basebenzi baseKapa, eThekwini naseBuffalo City. Bantu boMzantsi Afrika.

Sinikezela ngeManifesto yoNyulo looRhulumente baseKhaya yowama-2026 njengesibophelelo seminyaka emihlanu sokwakha ooMasipala baBantu abaza kuzisa iNkululeko yezoQoqosho.

Uloyiso okanye Ukufa—votela i-EFF!
IsiHlomelo A:

H. ISIHLOMELO A: ISIBHENGEZO SOCEBA WE-EFF

Mna, _____, ndiyavuma ngokuzithandela ukuthunyelwa yi-Economic Freedom Fighters ukuba ndibe nguCeba kurhulumente wasekhaya.

- Ndizibophelela ngokundilisekileyo ukuba ndiza kukhonza abantu boMzantsi Afrika ngoqeqesho, ukunyaniseka, ukuthembeka nokuzinikela kwinguqu.
- Ndiyaqonda ukuba ukuthunyelwa asilolungelo okanye ingqesho, kodwa luxanduva nomyalelo wombutho.
- Ndifunga ngokundilisekileyo ukuba ndiza kuba nguCeba othembekileyo kuluntu lwam nakubantu boMzantsi Afrika.



- Ndiza kuhlala ndifumaneka ukuze ndikhonze uluntu lwam iiyure ezingama-24 ngosuku.
 - Ndiza kuhlala kwiwadi yam ngalo lonke ixesha lesikhundla sam kwaye andiyi kufuduka.
 - Andiyi kubandakanyeka kurhwaphilizo okanye kubusela.
 - Andiyi kubandakanyeka kurhwaphilizo loluhlu lwezindlu.
 - Andiyi kubandakanyeka kurhwaphilizo lweenkqubo zengqesho.
 - Andiyi kuqhuba ishishini nomasipala okanye ndithathe inxaxheba kwiithenda.
 - Andiyi kwenza ubundlobongela obusekelwe kwisini okanye esinye isenzo esinyhasha isidima namalungelo oluntu asisiseko abasetyhini nabantwana.
 - Andiyi kusebenzisa iziyobisi okanye ndibonwe ndinxilile esidlangalaleni.
 - Ndiza kuhlawula imirhumo yam yombutho ngokupheleleyo nangexesha, inyanga nenyanga, kwaye andiyi kusilela kwesi sibophelelo.
- Ndiyavuma ukuba xa ndithe ndophula ezi zibophelelo, uMgaqo-siseko we-EFF, iManifesto yokuSungulwa, uMgaqo wokuZiphatha okanye imiyalelo yombutho, i-Economic Freedom Fighters kufuneka indibuyise kwaye indisuse ekuthunyelweni kwam njengoCeba.

KUSAYINWE e-_____ ngolu suku lwe-__ ku-_____ 2026.

UCEBA

Utyikityo: _____

EGAMENI LE-ECONOMIC FREEDOM FIGHTERS

Ogunyazisiweyo ukutyikitya: _____

Utyikityo: _____

INGQINA 1

Igama: _____

Utyikityo: _____

INGQINA 2

Igama: _____

Utyikityo: _____